

**PEMBERITAHUAN PERTANYAAN LISAN**  
**DEWAN RAKYAT MESYUARAT KETIGA, PENGGAL KETIGA,**  
**PARLIMEN YANG KE-13**

**PERTANYAAN : LISAN**  
**DARIPADA : TUAN HAJI KHALID BIN ABDUL SAMAD**  
**(SHAH ALAM)**  
**TARIKH : 20 OKTOBER 2015 (SELASA)**  
**NO. SOALAN : 12**

**SOALAN : Minta Perdana Menteri menyatakan pendirian Kerajaan terhadap semua insiden berbaur perkauman dan tindakan yang sedang dan bakal dilaksanakan.**

**JAWAPAN :**

**Yang Di Pertua,**

YAB Dato' Sri Najib Tun Razak menegaskan kerajaan tidak akan berkompromi terhadap mereka yang dengan sengaja membangkitkan perkara yang menimbulkan kemarahan rakyat dan menggugat ketenteraman awam tanpa mengira status akan didakwa di bawah undang-undang yang sedia ada. Tindakan pendakwaan diambil kepada sesiapa sahaja tanpa mengira status yang melanggar undang-undang di samping bertujuan memberikan pengajaran yang sesiapa yang terlibat dan seterusnya menjadi teladan kepada orang awam. Kerajaan sentiasa membuat peringatan, amaran serta penegasan dan akan terus komited

mempertahankan agama dan bangsa daripada golongan yang tidak bertanggungjawab.

**Tan Sri Yang DiPertua,**

Kerajaan menggunakan pendekatan **mendampingi dan mendidik** dengan izin "**engage and educate**" merupakan mekanisme yang sentiasa diketengahkan untuk menyatupadukan rakyat. Antara langkah-langkah yang diambil oleh Kerajaan adalah seperti berikut:

- a) Mempergiatkan lagi persefahaman di kalangan penganut agama melalui **Jawatankuasa Mempromosikan Persefahaman Dan Keharmonian Di Antara Penganut Agama (JKMPKA)** dengan mengadakan Perbincangan Meja Bulat (RTD), Dialog keagamaan dan sebagainya.
- b) Memperkasakan **Program Skuad Unity** yang akan menjadi perantaraan antara agensi-agensi kerajaan dengan masyarakat yang berperanan untuk mengukuhkan semangat perpaduan di kalangan masyarakat sejajar dengan penyatuan nasional.
- c) Memperkenalkan **Program Sayangi Komuniti** dengan memberi penekanan kepada keselamatan, kebersihan, keselesaan, pendidikan, kesejahteraan dan semangat perpaduan di kawasan kediaman terutama di kawasan Projek Perumahan Rakyat (PPR).
- d) Menggalakkan penyertaan belia dan mengambil bahagian di dalam **siri wacana, perbincangan meja bulat, seminar dan**

**forum** bagi percambahan idea untuk meningkatkan kefahaman mengenai inti pati Rukun Negara, Kontrak Sosial dan Perlembagaan Persekutuan.

- e) Menyebarluas pendidikan perdamaian di kalangan ahli-ahli masyarakat sebagai **Mediator Komuniti** untuk menyelesaikan konflik di peringkat komuniti.
- f) Meningkatkan penghayatan terhadap **MyRukun Negara** sebagai asas perpaduan nasional di peringkat sekolah rendah, menengah serta **Sekretariat Rukun Negara** di IPTA dan IPTS.

Antara program / aktiviti inovasi baru yang diperkenalkan sebagai ***The Way Forward*** ialah:

- a) JPNIN dalam penyediaan **Pelan Tindakan Perpaduan Negara** yang akan dilaksanakan oleh semua agensi Kerajaan ke arah perpaduan nasional dan kesepaduan rakyat Malaysia dan dijangka bermula tahun 2016.
- b) **Melaksanakan Program latihan industri perpaduan atau *Unity Internship Programme***. Program ini bertujuan untuk menangkis persepsi bahawa syarikat-syarikat bukan bumiputera hanya mengambil pekerja yang terdiri daripada kelompok kaum tertentu sahaja. Program latihan industri perpaduan ini dijalankan sebagai kaedah menggalakkan silang budaya untuk pengukuhan perpaduan dengan izin ***cross-cultural***, pemahaman antara agama, ***inter-faith*** dan penerimaan antara kaum atau ***inter-race***.

- c) Memantapkan perpaduan melalui program informasi yang disampaikan melalui tema dan mesej perpaduan iaitu, **“Membudayakan Perpaduan, Meraikan Kepelbagaian”**.
  
- d) **Mendampingi rakan-rakan Perpaduan** atau *partners in unity* untuk mengukuhkan jaringan sosial dengan pertubuhan sukarela dan badan bukan kerajaan/NGO untuk menyebarkan mesej perpaduan.

Secara keseluruhannya, Kerajaan telah melakukan pelbagai usaha dalam mengekalkan perpaduan kaum di negara tercinta ini. Kita sebagai rakyat Malaysia tanpa mengira anutan fahaman politik seharusnya bersyukur dengan keamanan yang kita kecapai hari ini, walaupun ada perbezaan ideologi politik, kita haruslah mengawalinya supaya tidak menjadi tegang serta menjaga hubungan baik sesama masyarakat dengan keharmonian yang telah terbina sekian lama.

Sekian, terima kasih.